



En servezzan dal stadi Vatican: Litinent colonel Leonhard Anton Willi (maletg sura), chapitani Fidel Crufer; a san. il tshop dal chapitani dals Zuavs Joh. Anton Thomalè, emprests da la vischnanca da burgais Domat.



La Guardia svizra – ina tradiziun dals da Domat a Roma. Sin il maletg sergent Fridolin Fetz (1917-1994).

FOTOS MUSEUM RETIC

# Umens da Domat en servezzan ester

In'expoziun extraordinara en il Museum Retic sa deditgescha al mercenariat. En servetsch dad imperatur, retg e papa èn stads era particularmain blers umens da Domat.

CLAUDIO WILLI

La directura dal museum Andrea Kauer ha declerà dacurt a la vernissascha, ch'ins haja cun l'expoziun mess l'uman da quel temp en il center, «evitond tut las eroisaziuns». En il pajais alpin criv Grischun s'haja circa in terz da la populaziun giuvna masculina decis, causa la misera economica, da daventar mercenaris. Ils Grischuns en servezzan ester avevan bainbaud ina fitg buna reputaziun ed eran tschertgads da las differentas chasas roialas e dals potentats. La directura dal museum ha engrazià per tut ils documents ed emprests ch'il museum haja survegnì da tut las varts per l'expoziun extraordinara. Ella ha engrazià surtut era a la vischnanca burgaisa da Domat per ils emprests, ils quals dettian perditga da la gronda tradiziun da mercenariat da Domat e possian vegnir presentads en connex cun l'expoziun extraordinara.

## Frantscha, Napoli e'l stadi vatican

Sper la Frantscha s'han laschads recrutar umens da Domat er sunter il Congress da Vienna tranter 1827 e 1859 per il 3. regiment svizzer a la cuort roiala dal rai da Napoli u dal 1832 fin 1859 per l'emprim regiment papal dad es-

ters. En l'expoziun chattan ins maletgs dad uffizials da renum da Domat, sco Leonhard Anton Willi (1803-1889), il qual deriva sez d'ina famiglia da mercenaris. El ha servi a Napoli sco sergent grenadier, per part era'l activ a Cuira e fascheva reclama per ses regiment. Durant la campagna militar en Sicilia è el vegnì blessà ed è turnà da l'onn 1853 en sia patria, nua ch'el è daventà president communal. Da sia discendenza fan part tranter auter l'vestg da Limburg Dominicus Willi e l'entagliader da mascras Albert Anton. Fidel Crufer (1820-1884) era en il servezzan da l'armada papala dal stadi vatican. Sco chapitani s'ha'l participà a la defaisa da Roma cunter il moviment unitar talian ed è turnà sunter la conquista da la Citad eterna a Domat. Fidel Crufer aveva dus frars, Carl e Giacum Luzi, ch'eran medemamain en servezzans esters. Il tshop d'ordonanza cotschen da Giacum Luzi Crufer, tenent dals voluntaris tar il 1. regiment da la British-Swiss Legion (1824-72), il qual era en acziun a la Guerra da Crimea 1855/56, è era expost e sveglia oz cun la situaziun actuala patratgs particulars. In'uniforma da gala garnida cun medaglias dal chapitani dals Zuavs Joh. Anton Thomalè (1834-1883) deriva dal possess da la vischnanca burgaisa da Domat.

## La Guardia svizra – tradiziun da Domat a Roma

En la Guardia svizra papala n'han servì dapi l'onn 1854 betg damain da 42 umens da Domat. Uschia è la vischnanca da Domat quella che metta a disposiziun ils pli blers gardists dal Grischun. Sin nivel svizzer ranghescha Domat sin la sisavla piazza. A quai renda attent il maletg cun Fridolin Fetz (1917-1994), en la Guardia svizra dal 1941-1956. L'anterur gardist svizzer è a las annadas pli attempadas anc en megliera memoria sco portier robust tar la Banca Chantunala Grischuna a Cuira.

Ils servezzans militars a l'ester han senza dubi influenzà considerablamain cultura e tradiziun a Domat. Quai badan ins anc oz tar festas ecclesiasticas, cur che la Cumpagnia da mats sa metta a Sontgilcrest en posiziun. Uniformas istoricas èn concepidas tenor las directives or da servezzans esters. Las processions da Sontgilcrest e Nossaduna d'avust, las qualas tutgan tar las festivitads las pli impurtantas da la vischnanca, èn influenzadas dals servezzans mercenaris. Medemamain mussan las uniformas istoricas da la Musica da Domat u dals «Emser Tambouren» ch'ellas èn inspiradas dals servezzans a l'ester.